



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

34. Kalenderwoche – ab 21. August 2011

Bloss ma so...

...wemmor ma annemm dädn, de Mauor däde noch da sein... - isch meene, de Mauor, die ooch andifaschidischer Schudzwall geheebn had. Die Mauor, die mir vor fuffzisch Jahre bei Nachd un Nähbl offgebaud ham. Die se dann zur Wende niedorgerubbd ham. Die Mauor meen isch! Wo nu jedzde - anlässlich vom 50. Jahredaach - in alle Zeidungen nochma alle Obfor, die se findn kenn, exhumierd un offgefahrn wern, damid alle sähn kenn, was de DDR fiehr e Unreschdssysdehm gewähsn is. Bluhdrinsdisch, gnadnlos, mänschenverachdend... - ehm das Geeschndeel vom Gabidalismus. Dähr is ja bekanndlich seid dor Wende das besde Sysdehm, was wo gähm dud! Lieb, nedd, kuschlich...!

Ja, es dud ja nisch viel "an Himml off Ährdn" fähln, wensde so die Sonndachsrednor heern dusd. Besondorsch die ehemalischn Dessidendn! Die Nesdflischdor aus dor DDR! Also die, die schon immor gewussd ham, dass dähm Gabidalismus de Zukunfd geheern dud. Ja, schon immor! Schon zu Zeidn, wo se ooch im Wesdn nisch mähr gegloobd ham, dass dor Gabidalismus sieschn dun kann. Un die, die schon immor an dähm Gabidalismus gegloobbd ham, die ham ja ooch werglich Reschd gehabbd. Dähm Gabidalismus dud de Zukunfd geheern!

Abor keenor sachd, wie die Zukunfd aussähn soll. Un wie lange die Zukunfd noch durschhaldn dud! Un woran die Zukunfd vorreggn dun wird. Nee, daderdriebor denkn die nisch nach.

Un die Leide, die daderdriebor nachdenkn dun, wodran de Zukunfd vorreggn dun wird, die Wissensschafdlor, Fillesohn - un Bollediggor, die nisch in dor Regierung sidzn dun... - solsche schlaun Leide dun irschendwie nisch zu Worde komm. Jedzde!

Also, ooch sonsd sähr seldn! Abor jedzde, wos um de Mauor gehn dad, ieborhaubd nisch! Da ham die sisch vornähm zurigg gehaldn. Odor se sinn zurigg gehaldn wordn! Mir ham ja Bressefreiheit! De Bresse had de Freiheit, bloß das zu druggn, was dähm Scheff gefalln dud.

Nascha, abor wemmor ma schbaßnshalbor annemm dädn, de Mauor däde nisch niedorgerubbd wordn sein... wenn die noch da sein däde... - was uns da alles fähln däde! Isch meene, wemmor ma iebor dähm eischnen Dellorrand nausguggn dud... so, in de Weld naus!

Nee, wemmor anguggn dud, was in dor Weld alles los is, da kammor ieborhaubd nisch mähr vorschdehn, wies ma Leide gegähm had, die dähm Gabidalismus nisch scheen gefundn ham! Wies ma welsche gegähm had, die eene Mauor offgebaud ham! Ohne, dasses sich reschnen dad! Bloß so aus Daffge! Odor bloß um uns damals dähm Weesch in de Zukunfd zu vorrammln. Isch meschde nisch wissn, wieviele ohne de Mauor noch in dor DDR geblichm sein dädn? Un währ hädde dann das Lischd ausgemachd?

Eduard Sachsenmeyer